

15. oktober 2013

UKA 2013/105
Per Berthelsen

Siunnersuut uunga: Suliniutini angisuuni illuliortiternernik sanaartornernillu suliasat pillugit Inatsisartut inatsisaat nr. 25, 18. december 2012-imeersup allangortinnissaa pillugu Inatsisartut inatsisaat nr. xx, yy 2013-imeersoq (suliniutinut angisuunut inatsit)

(Inuussutissarsiornermut, Aatsitassanullu Naalakkersuisoq)

Inatsisartut inatsisaata "Suliniutit angisuut pillugit inatsimmik" taaneqartartup, kingullermik ukiakkut ataatsimiinnermi Inatsisartut ataatsimiittarfianni tusagassiuutitigullu annertuumik oqallisaasup allangortinnissaanut siunnersuut Naalakkersuisut matumuuna saqqummiuppaat.

Nunanit allaneersut aningaasarsiaannut atorfinitsinneqarnerannullu pissutsit, ataatsimoorussamik isumaqatigiissuteqarnissamut pisinnaatitaaffii kiisalu sumiiffinni sulisoqarnermut atatillugu kattuffiit suliumajunnaarnissamut periarfissaat illuatungeriinnit isumaqatigiinngisutigineqarput.

Suliffeqarnermik suliallit sukumiisumik tusarniaaffigineqareermata, Naalakkersuisut matumuuna allannguutissamik siunnersuuteqarput. Nunanit allaneersunut suliarortunut atu-gassarititanik erseqqissaataasussat paasinarnersitsisussallu pisariaqartinneqartut qulakkeernissaat minnerpaamik anguniarlugu.

Suliniutit angisuut nammineq Kalaallit Nunaanni isumalluutigisinnaasagut tunngavigalugit suliarisinnaannginnerat nassuerutigalugu, ingerlatsiviit angisuut nunanit tamaneersut suleqatigalugit Naalakkersuisut tamatumuuna suliniutit angisuut naammassineqarsinnaanissaat periarfissinniarpaat.

Anguniagaq ersarippoq, tassa siunissami ineriartortitsinissami suliniutit angisuut suliarineqassatillugit ilisimasariallit piginnaanerillu suliniutip angisuup siulliup piviusunngortinnerani angusat iluaqutigalugit – annerusumik – suliariniakkanut suleqataalluni peqataasinnaalernissaq.

Naalakkersuisut taamaammat aamma erseqqissaatigaat, Nunatta Karsiata aningaasanik immernissaa kisiat anguniarnagu aammali inuiaqatigiinni piginnaasanik annertusaanissaq, suliffinnik pilersitsinissaq kiisalu inuusuttut ilinniagaqarnissaannik kaammattuinnissaq kiisalu ineriartorneq ilutigalugu pisariaqartitanik ilinniagaqarsinnaaneq anguniarneqarmat, Siumup tungaanit siunnersuut tamakkiisumik tapersorsorparput.

Allannguutissatut siunnersuutip saqqummiunnerani aaqqiissutissat arlallit, soorlu aningaasarsiat appasinnerpaaffissaanut tunngasut, sulinngiffeqarnermi aningaasarsiassanik sulinermi katersisinnaaneq, kiisalu sulisut nerisaqarneri ineqarnerilu eqqarsaatigalugit aningaasarsiat naatsorsornerinut sunniuteqannginnissaasa qulakkeernerat erseqqis-

sarneqarput, suliffeqarnermut suliallit namminneq aningaasarsiat atorfininnermullu pissut-sit pillugit isumaqatiginninniarsinnaanerat mattutinngikkaluarlugu.

Taamaatumik "Suliniutit angisuut pillugit inatsimmut" allannguutit minnerpaaffissanik qulakkeerutaaginnassapput. Tamannali pingaaruteqarluinnarmat, Siumup tungaanit annerusumik eqqarsaatigeqqaanngikkaluarlugu siunnersuut saqqummiunneqartoq taperserparput.